

Headlines

1. केंद्री सेहत मंत्री जे.पी नड्डा होरें मुल्लखै च डेंगू ते मलेरिया दी स्थिति दी समीक्षा कीती, राज्यें गी एहतियाती उपाऽ तेज करने पर जोर दित्ता।
2. उपराज्यपाल मनोज सिन्हा होरें आखेआ ऐ जे नमे आपराधिक कनून आतंकवाद गी दना बर्दाश्त नेई करने बक्खी इक बड्डी गैंऽ ऐ।
3. रेलवे बडगाम थमां दिल्ली तोड़ी डेलीपार्सल ट्रेन शुरू करने जा'रदा ऐ। उपराज्यपाल ते मुख्मन्त्री होरें फैसले दा सुआगत कीता।
4. डोडा च माहौल अजें बी तनोतनी आहला, एहतियात दे तौरा पर लाई दियां बंदशां जारी।
5. जम्मू-कश्मीर च कल बी मौसम आमतौरा पर खुश्क पर गुम्मे आहला रौहग, 13 सितंबर गी बरखा बरने दे असार।

<><><><><><>

Health Minister Dengu

केंद्री सेहत मंत्री जे.पी नड्डा होरें मुल्लखै च डेंगू ते मलेरिया दी मौजूदा स्थिति दा जायजा लैता ते राज्य सरकारें आसेआ कीती जा'रदी रोकथाम आहली गतिविधिएं दा बी निरीक्षण कीता। इस समीक्षा बैठक च नड्डा होरें डेंगू ते मलेरिया दी रोकथाम ते नियंत्रण करने च औने आहली मुख्म चुनौतियें ते मौजूदा स्थिति दा जायजा लैता। उनें राज्यें, मुकामी निकाएं ते समुदायें खास करी मती जोखिम च रौहने आहली आबादी च लोकें दी सेहत दी रक्षा करने आस्तै रोकथाम ते नियंत्रक उपाएं च तेजी आहनने दा आग्रह कीता। उनें सब्बनें सरबन्धी धड़ें गी डेंगू ते मलेरिया पर असरदार ढंगै सिर काबू करने दे उपाएं ते समुदाय दी जागरूकता गतिविधिएं गी बढ़ावा देने दा आग्रह कीता। उनें मुख्मन्त्रिं ते सेहत मन्त्रिं गी आपूं निजी तौर पर स्थिति दी समीक्षा करने ते कार्यकारी योजना तैयार करने दी सलाह दिती।

<><><><><><>

LG-Criminal Laws

उपराज्यपाल मनोज सिन्हा होरें आखेआ ऐ जे भारत दे नमें आपराधिक कनून मुल्ख दी आतंकवाद गी दना बी नेई बर्दाश्त करने ते समाज थमां आतंकवाद गी खत्म करने आहली नीति गी मजबूत देडन। जम्मू-कश्मीर पुलस पब्लिक स्कूल बैमीना च बोलदे होई उपराज्यपाल होरें आखेआ जे नमें आपराधिक कनूनें 150 ब'रे परानी दंड संहिता दी थाहर लैती ऐ। उनें आखेआ जे एहू इक ऐतिहासिक गैँऽ ऐ जेदे कन्नै न्याऽ सरिस्ते च सुधार ते बदलाव कीता गेआ ऐ। एहूदा मुख करी ध्यान पिछड़े दे समूहें दे हितें दी राखी करना ऐ। सिन्हा होरें आखेआ जे एहू प्रक्रिया 2019 च शुरू होई ही जिसले प्रधानमंत्री होरें ब्रिटिशें दे समें दे बने दे कनूनें दा परतिए जायजा लैने लेई आखेआ हा।

<><><><><><>

Apple Parcel van

जम्मू-श्रीनगर राष्ट्री जरनैली सिडकै पर केई थाहें ल्हास-पस्सियां पौने ते सिडकै पर गड्डिएं दी आओ-जाई बुरी चाल्ली प्रभावत होने करी फल उत्पादें गी होआ करदे बड़े भारी नुक्सान गी घट्ट करने दे मकसद कन्नै भारती रेलवे नै दिल्ली थमां बडगाम तोहड़ी प्राथमिकता दे आधार उप्पर इक बशेश पार्सल ट्रेन चलाने दा ऐलान कीता ऐ। सोशल मीडिया पर इक पोस्ट च रेल मंत्री अश्विनी वैष्णव होरें आखेआ ऐ जे एहू ट्रेन अज्ज बडगाम च सेअउएं कन्नै लद्दी जाहग ते उत्थुआं इसी पैहल दी बिनाहू उप्पर दिल्ली खाना करोआया जाहग। लेफ्टिनेंट गवर्नर मनोज सिन्हा होरें इस गैँहू लेई प्रधानमंत्री नरेन्द्र मोदी ते रेल मंत्री अश्विनी वैष्णव हुं'दा धन्नवाद करदे होई आखेआ ऐ जे एहूदे कन्नै फल उत्पादें गी बड़ी बड़ी राहत थ्होग। तोआई मुखमंत्री उमर अब्दुल्ला होरें बी इस मदाद लेई रेल मंत्री हुंदा आभार जताया ऐ। सोशल मीडिया पर इक पोस्ट च मुखमंत्री होरें आखेआ ऐ जे बागवानी मैहकमा, फल उत्पादकें कन्नै तालमेल बनांदे होई इस गैँहू गी तोढ़ चाढा करदा ऐ।

<><><><><><>

GST Reforms

समूलचे जम्मू-कश्मीर च आम लोकें ते कारोबारिएं बी हाल च सरकार आसेआ जी.एस.टी दिएं दरें च कटौती दे ऐलान दा बड़ा मता सोआगत कीता ऐ। अगली पीढी दे एकडे जी.एस.टी सुधारें दे तैहत सरकारै घरें च इस्तेमाल होने आहले इलेक्ट्रॉनिक समेयान गी मता किफायती बनाइयै मझाटले तबके दे लोकें गी बड़ी बड़ी राहत दिती ऐ। एयर कंडिशनरें, डिशवाॅशरें ते एल.सी.डी ते एलईडी टेलीविजनें पर जीएसटी दी दर गी 28 फीसद शा घटाइयै 18 फीसद करी दित्ता गेआ ऐ। इलेक्ट्रिक गड्डिएं गी लाहू होग। उनेंगी 5 फीसद आहली स्लैब च रक्खेआ गेआ ऐ जिसले कि लगजरी गड्डिएं पर 40 फीसद टैक्स लग्गोग।

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओहू जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले -पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Doda-Tense

डोडा जिले च जंदे रोज आम आदमी पार्टी दे विधायक महाराज मलिक गी पी.एस.ए तैहत गिरफ्तार कीते जाने दे बाद प्रदर्शनकारिएं ते सुरक्षा बलें बश्कार हिंसक झड़प्फें ते 80 कोला मते लोकें गी गिरफ्तार कीते जाने दे बाद उत्थे हालात अजें बी तनोतनी आहले बने दे न।

आकाशवाणी दे जम्मू संवाददाता नै जानकारी दिती ऐ जे जिले च किश बंदशें आहले हुक्म अज्ज उप्परोतली त्रीए रोज बी लागू न जिसले के मोबाइल इंटरनेट ते वाईफाई सेवां बी एहतियात दे तौरा पर बंद रक्खियां गेदियां न। प्रशासन नै भारतीय नागरिक सुरक्षा संहिता कनून दे धारा 163 तैहत विजन परमिशन दे लोकें दी आओजाई पर बी पाबंदी लाई दी ऐ। तोआई, जिले च सब्बै स्कूल ऐतवार तोड़ी बंद रखने दा हुक्म जारी कीता गया ऐ ते सब्बै बजार ते कारोबारी इदारे बी पूरी चाल्ली बंद न।

<><><><><><>

CS-DFCO

सार्वजनिक सेहत दे महत्वै पर लोऽ पांदे होई मुख सचिव अटल डुल्लु होरें समूलचे जम्मू-कश्मीर च सुरक्षित ते साफ-सुथरी खाद्य आपूर्ति जकीनी बनाने लेई कानून नाफिस करने आहले तंत्र गी तगड़ा बनाने सने असरदार निगरानी ते सख्त नियंत्रण दी जरूरतै पर बी जोर पाया ऐ। डुल्लु होरें एह गल्ल केन्द्र शासित प्रदेश दे बक्ख-बक्ख हिस्सें च पिच्छले दिनें खराब मांस जव्त कीते जाने दी पच्छोकडै च दोआइएं ते खाने-पीने दे समेयान पर नियंत्रण रक्खने सरबन्धी संगठन दे खाद्य सुरक्षा विंग दे कम्मैकाजै दा जायजा लैने आस्तै सद्दी गेदी इक उच्ची सतह दी जायजा बैठक दी प्रधानता करदे होई आक्खी। उनें खाने-पीने सरबन्धी चीजें दा कारोबार करने आहले इदारे च निरीक्षण बधाने ते नियमें दी उल्लंघना करने आहलें खलाफ सख्त कार्रवाई करने दे निर्देश बी जारी कीते।

<><><><><><>

Hangul Conf

हंगुल सने विलुप्त होने दी कगार पर पुज्जी गेदे खुर आहले होरनें जनौरें बारै स्कॉस्ट कश्मीर च कल्लै थमां दुए अंतर्राष्ट्री सम्मेलन दा आगाज़ होआ। त्रंऊ दिनें दे इस सम्मेलन दा मकसद कश्मीर दे मशहूर हंगुल हिरण सने एहदे कन्नै जुड़ी दिएं होरनें प्रजातिएं दे संरक्षण सरबन्धी जरूरतें गी उजागर करना ऐ। देसै दे बक्ख-बक्ख हिस्सें सने होरनें मुखें जि'आं अमरीका, कनाडा, ब्रिटेन, मध्य पूर्व ते मध्य ते दक्खन एशिया दे मुखें थमां बी वन्य जीवें सरबन्धी तकरीबन 200 माहिर-विशेषज्ञ इस सम्मेलन च हिस्सा लै करदे न।

<><><><><><>

Agri-Deptt.

जिला राईबाई मैहकमा रामबन नै फसलें दी बाड्डी दरान जरूरी सुरक्षा ते एहतियात बारै करसानें गी जागरूक बनाने लेई कार्जक्रमें च बाद्दा कीता ऐ जिंदे राएं करसानें गी सरकार आसेआ शुरू कीती गेदिएं बक्ख-बक्ख स्कीमें दे बारै च बी जानकारी दिती जंदी ऐ। इस चाल्ली दे जागरूकता कार्जक्रमें दरान उनेंगी ढंग सरिस्ते दे बारै च बी जानकारी दिती जंदी ऐ। एहदे कन्नोकन्नी राईबाई दे नमें ढंग सरिस्ते अपनाने दे बारै च बी उनेंगी दस्सेआ जंदा ऐ। फसलें दी दिक्खभाल, मिट्टी दे संरक्षण ते ओहदे नरोएपन दे बारै च जागरूकता, मिट्टी ते पानी दे हेल्थकार्ड दे फेयदे ते होर बी जानकारी इनें कार्जक्रमें राएं उन्दे तगर पुजाई जंदी ऐ।

<><><><><><>

Weather

मौसम विभाग नै आखेआ ऐ जे जम्मू-कश्मीर च मौसम आमतौर पर खुश्क, गर्म ते उमस आह्ला रौहगा। किश थाहरें पर हल्की बरखा जां गरज-चमक होई सकदी ऐ। जम्मू खित्ते दे किश जिलें च दरम्याने दर्जे दी बरखा 13 सितंबर गी बड्डलै होई सकदी ऐ ते किश थाहरें पर इस्सै रोज हल्की बरखा पौने दी मेद ऐ। 14 थमां 17 सितंबर बश्कार किश थाहरें पर हल्की बरखा ते गरज-चमक होई सकदी ऐ। किश थाहरें पर ल्हास-पस्सियां ते कुप्पड़ पौने दी मेद बी जताई गेई ऐ।

<><><><><><>